



Il reservat da gaud Soliva è sur la vischnanca da Mustér siador.

FOTO S. CATHOMEN

Reservats da gaud per la diversidad

■ (rtr) En Surselva datti 11 reservats da gaud che dattan spazi da viver ad animals e plantas. Ulteriurs duain anc suandar. La vischnanca da Mustér ha montà dacurt ina tavla d'infurmaziun davart il reservat da gaud Soliva. Tenor il selvicultur da Mustér, *Simon Cathomen*, vul ins far attent sin quest reservat. «La glied duai observar la natira dretg e sanester dal trutg», declera el. Tals reservats da gaud n'èn numnadain betg martgads en il gaud sez.

Sco quai che *Christian Buchli* da l'uffizi da gaud e responsabel per ils reservats en Surselva di vegnia il pled «reservat» interpretà magari in pau negativ e collià usch scumonds. Ma quai na saja betg uschia. Ins na dastgia sulet betg tagliar ora laina u laschar pascular vatgas u animals manidels en quests reservats.

Tut il rest saja lubì sco en ils auters gauds.


Crear spazi da viver

Cunquai ch'ils gauds na dastgan betg vegnir cultivads hajan quels era la pussaivladad da vegnir vegls. «Quai vul dir ch'i dat plantas mortas, plantas ch'èn crudadas e che smarscheschan. Quai è in grond spazi da viver per blers animals, plantas, mistgels e bulieus. Perquai vulan ins promover quests reservats», declera Buchli vivanant. Las experientschas cun ils reservats existents mussian che quels hajan l'effect giavischà, numnadain d'augmentar la diversidad da fauna e flora.

Reservats en Svizra

A Mustér è il gaud en la regiun da Soliva vegnì defini sco reservat. Tenor Catho-

men sa tracta quai d'in gaud spezial. En quest gaud creschia il sember, ina planta che na saja betg uschè derasada. Ultra da quai na saja il gaud betg cuntanschibel cun vehichels e na vegnia era betg nizzegià. Mintga vischnanca po decider sezza sch'ella vul crear in reservat da gaud u betg. Ella surdat l'incumbensa al chantun da far in prestudi e decida lura sch'ella vul la finala far in contract da 50 onns cun il chantun. Las vischnancas vegnan indemnisadas cun 20 francs per hectara ed onn. Tar la vischnanca da Mustér che ha in reservat da radund 50 hectaras dat quai la finala var 1000 francs per onn. En Surselva datti fin uss 11 reservats. Quels cumpiglian var 3,7% dal gaud. La finamira è d'avair 5% dal gaud en reservats e perquai sajan ulteriurs reservats en planisaziun en Surselva, declera Buchli.



Ils 11 reservats da gaud en Surselva.

FOTO UFRIZI DA GAUD E PRIVELS DA LA NATIRA